

大清畿輔先哲傳

賢能傳四

大清畿輔先哲傳第三十一

天津徐世昌撰

和氏璽

杜霽遠

和氏璽字荆石號北沙永年人康熙三十年進士授閩縣知縣閩
爲九郡首邑繁劇號難治氏璽至戴星出入察民疾苦省徭役嚴
保甲革除徵收火耗懸鉦縣門黠胥作姦私索者許擊鉦以聞立
置之法邑之東鄙有鼓山里田賦積弊增他鄉數倍輸戶重困有
典鬻子女馱賠者氏璽以馱賠固病民清除又病賦乃汰其重者
以他項羨餘向充縣官私橐者捐以抵賦額著爲定例民獲更生
肖像祠之閩俗好訐訟喜羅織氏璽絕請託以曲直爲勝負民大
畏服己卯分校文武闡矢公矢慎所得士皆一時名雋尋以事罷
吏議當事以氏璽實賢能復起爲同安知縣同故邊海巖疆地僻

民瘠下車卽輕徭清賦儆暴扶弱興學造士治一如閩泉州有鎮
帥擅權恣威勢虐民氏璽峻裁以法坐是忤帥意欲中傷之適營
弁縱兵擾民治之如律帥默示弁意率眾哄於堂遂乞休士民遮
道哀留如失怙恃曰公去吾屬無噍類矣督撫察其情疏治弁罪
力挽之以勞卒官疾革時告其子及人曰吾爲民牧死生以之今
而後不負吾素志矣命取紙筆大書爲民請命死而後已八字擲
筆而逝年五十七永年人比之杜霽遠霽遠亦永年人順治九年
知安化縣招徠流民八百餘戶墾田七百餘頃出資繕城堞立學
校收斂遺骸政聲甚著尤爲時所稱

成泰愼

成泰愼字知臣號懷嵐大名人大學士克鞏之孫也以恩蔭授江
南通州知州著崇川從政錄記其治行內升戶部員外郎晉郎中

出爲陝西西寧兵備道御番漢有恩威茶馬驛站墩堡諸政次第
修舉兵民肅然踰年調浙江糧儲道卻旗丁鋪設費萬金尋署按
察使訪禽地棍張端木邢於堦置之法豪民歛迹撫軍疏薦賢能
第一會聞祖訃請奔喪舊例無次嗣承重者泰愼力請具題得如
所請今定例長嗣亡次嗣得承重自泰愼始也服闋補廣東雷瓊
道海賊盜鑄錢肆刦奪恃漁戶資糧以導之泰愼爲編船戶連保
甲出入以時有王飛熊等五十餘人燬舟投首泰愼送之營伍俾
自效海道遂清兼攝雷瓊兩府五指山生黎苦汎兵之擾嘯眾謀
爲亂提督某慮獲罪卸咎於泰愼坐是解官去粵之日囊橐蕭然
惟圖書數簏壓舟而已

張丙厚

猶子坦 塏

張丙厚字爾載號腹菴磁州人榕端之子也康熙三十三年進士

授交城知縣歲大歉徵餉之檄不轉燭而至者數慨然曰吾其逼民於枯朽也乃輦家財貸貧民報完西北山鄉盜藪廉得河北郡有惠重生者強幹有力以計致之假以都團練職盜乃息升刑部郎中禁勢家請屬桐城方苞以牽連入獄臺臣雜治之丙厚陳古義勸宰臣富寧安聞者易容其禍以雪平反者幾二百人旋致政歸里年羹堯總督川陝聞其名固請往時巡撫總戎旅見羹堯皆膝行惟丙厚獨長揖屹然眾人中方苞貽以書遂歸京師丙厚好射獵飲酒歌舞盛服玩偶儻有奇氣大興王源沒子兆符貧無依割田宅予之業師李明睿貧且死乏嗣爲置百金產擇繼引之家塾磁饑捐金煮粥食之親故孤嫠依者常百餘人其慷慨好施如此卒年五十九猶子塏坦

塏字朗士性篤孝居母喪毀瘠盡禮竹燈紙帳讀先世藏書聲淚

交下聞者酸鼻中康熙三十六年舉人授刑部員外郎遇命盜案
覆閱再三筆躊躇不忍下大司寇廉其仁屬以青海獻俘諸大獄
獄上稱平往時重囚爲隸卒所虐多痍死塏稔知其弊日必詣獄
省視夏月洗剔杻械沃以水漿冬製絮襖給之施善藥療其疾終
其任囚無失所者雍正二年以恩例應升知府念母老告歸卒年
五十五

坦康熙五十一年進士雍正八年知祿勸縣值東川法戛軍需後
州民凋敝適昭通築城徵民夫坦爲力請免役凡訟者片言而折
民到於今稱之官至陝西潼商兵備道

賈樸

從弟棠

棠曾孫六奇

樸五世孫臻

賈樸字素菴號慎旃又號宜村故城人幼稟父潤庭訓博極羣書
同邑秘丕笈四明仇兆鰲皆當代儒宗樸從之游其學業益進年

二十補博士弟子員康熙三十三年由明經例授廣西柳州同知
柳獍民雜處俗輕悍難馴樸爲治持大體四境帖然時思明土屬
負固抗官巡撫廉知其才調任思明親率兵剿之其地負山谷三
面繞水箐篁林莽環谷外數匝樸夜令疾足走間道潛入寨縱火
焚之土兵大駭內亂遂出降署思恩府府屬土田州岑氏母子爭
政土目陸師等鬪之以爲己利殺千餘人樸至切諭母子俱感泣
投誠土目聚眾謀不軌樸檄所部兵揭竿爲旗旗各一隊兵少令
一隊爲數周登台而上下之師等懾不敢動因單騎至營曉以禍
福皆羅拜自囚聽命乃掩骼埋胔設壇爲文以弔亡魂建明倫堂
設義學出俸金代完寒士負糧田民感激立生祠事之擢貴州平
越知府以望誤去官士庶韋奇才羅勤等率數千眾籲大府泣留
不得爲作歌詩紀其政方樸之任思恩也嘗條列邊事上巡撫彭

鵬鵬手錄之揭其文於壁屬吏入謁輒曰此思恩知府賈樸才兼
文武者也願君等以爲法瀕行太平副將謝某書來問撫苗計樸
以改土歸流告其後滇黔蜀粵諸苗卒如其議邊徼乂安四十年
詔舉品行清廉實心愛民之官鵬特疏薦樸有不縱苛斂不收
陋規之語上召問擢江南蘇州知府吳地衝繁民險健輕犯法
下車與僚屬吏民相見以誠屏請託絕苞苴政體清平政聲大振四十
六年上幸蘇州知其清廉爲當時第一擢江常鎮道吳江汪時
繹等數千人具捐保留人各持黃色旗書保留賢守四字遮道跪
車駕前上大喜御書宜民匾額賜之遷蘇松常鎮太糧儲道
布政使司參政兼管蘇州府事從民願也革四府徵糧例規所在
官吏積弊搜剔一清時總督噶禮以私意責望樸樸堅拒不應忤
其意以事劾之四十九年去官留吳門三年與儀封張伯行長沙

陳鵬年爲道義交歸里以疾卒樸性好施與凡鄉邑值荒歉疾疫水火天札諸變慨出資財濟之初赴京補官時悉詣故所負責者家曰恐別後無可將意乃焚其券當世以盛德稱之守蘇州日有句云一瓢酌吳水仰富天家恩景州牧周鉞爲顏其別墅曰唯飲吳水見者以爲紀實從弟棠棠曾孫六奇及樸五世孫臻皆有能名世稱爲賈家治譜

棠字青南號海瞻父泓有孝友至性修學振饑以長厚稱棠能文博綜羣籍康熙十年補博士弟子員讀書西城村舍體素羸弱屢遭父母憂經紀家計而勤學弗輟兩赴秋闈不第遂援例繇歲貢生入資爲郎三十二年授順天通判尋擢工部都水司員外郎督理街道升刑部福建司郎中充律例館纂修官三十七年除瓊州府知府瓊居粵東邊徼逼越南外海內黎素稱難治棠簡易近民

化頑梗以德屏除陋規無敢以私干者新澤宮桀郡乘建蘇海邱
三祠附祀任伯雨李光李綱諸公名曰景賢尤膺服邱濬之瓊台
棠稿世史正綱海瑞之平黎治河章奏封事爲關係世道文字曰
久簡編蠹蝕多有不可句讀者梓其文以傳世督撫郭世隆彭鵬
交薦其能遷廣東鹽運使兼鹽法道事是時東南監權弊百出竈
困商疲仰屋咨歎棠批卻導窾隨眾理解爲請帑本逐姦徒悉力
疏銷屢遭大吏譴責其志不撓終以考課未及額鐫級歸以疾卒
於家棠歷官二十載醇靜坦白日獨處一室頤養氣機吏以案牘
請卽起而肆應判決若流去則安坐如故雅好書史凡前賢著述
有裨益性命以及便於民生日用者必爲之校讐編輯出資刊之
其刻有明宋大參春秋繁露直解郁溪易紀張景岳醫書又搜輯
明馬中錫孫緒遺稿合而編之以公諸世其洗心筌一書則皆儒

先格言傳爲家箴者也初棠作修身銘曰忠孝立本方寸靜明物來順應鑑空衡平及病篤屬子孫云吾平生無善政善行可述卽以此銘諸石時論美之

六奇字罕衡一字漢恆號竹薌乾隆十七年副貢生知湖北恩施縣縣界黔蜀梟民好刀劍負前令墜之崖下六奇至招集鄉耆曉諭理法而記豪傑姓名以威懾伏之期年悍俗丕變歲饑代民納賦資產爲空解組日士庶爭號泣遮送謂曰歸吾賈父誰爲慈母六奇歎曰吾僅爲清白吏止矣何德焉蕭然就道歸里十餘年而卒六奇父如璽字信章雍正二年進士授主事工秦漢北魏篆隸諸體晚年字益險怪有古趣榜署書尤工六奇書樸米趙又得其父筆法人以縑素來者屢塞其門所撰清溪雜志略似北里志旣而自悔投諸火

臻字退厓號運生四歲侍父汝愚側父指星問何物曰星星又問月曰月也問何不月月對曰星眾月祇一耳父驚其聰異及長博學能屬文道光十二年成進士改庶吉士散館授編修十五年典試廣西十九年充順天鄉試同考官任科道巡視中城摧抑豪猾政聲藉藉旋因事落職下刑部陳光亨入視臻探問讞狀陳曰問是非乎問利害乎臻聞之爽然自此心益堅定數日理出鐫級以部曹需次二十九年授河南府知府清積牘五百餘事囹圄爲空咸豐三年調開封值粵匪煽亂江淮聞謀北犯創議籌防豫東以衛畿輔未及用而賊眾猝至城中守兵滿漢僅千人臻步行街衢勸居民登陴助守發聲慷慨繼之以泣得兵勇民壯萬八千五百餘人麇集城垣夜大雷雨臻策騎周雉堞而馳拊循士卒徹夜雨立無一人離次者賊驚竄繞大梁而西會托善兩軍自江北來大

府欲留之守城臻進言曰防土匪守土之責也西方無備可以此區區者羈大兵乎軍迺進遂得汜水之捷事聞特簡浙江寧紹台道留豫調充勝軍翼長尋授河南按察使創籌防局十年晉布政使立新倉儲穀足供十萬人四旬之食節浮費省虛糜一年之內庫儲贏往歲百餘萬設旌忠局築牛馬牆立碣樓事未竣去官十一年授安徽布政使攝巡撫事時羣寇蠡起江淮南北無完區逆賊苗沛霖勾結粵氛捻匪狡焉思逞臻駐軍潁州當皖豫之衝歲杪賊十餘萬眾麇聚穴地轟城臻嚴兵備以待意造子母三截連環錐以襲聽法度其地錐濠浸灌之間出奇兵搗賊巢平濠破壘尋其掘穴填塞之嬰城八十餘日勝保援兵至圍始解尋以病歸河南越二年復授貴州布政使未赴任卒時同治八年也河南潁州兩郡祠祀之臻歷官豫洛久整官常剔吏蠹籌防卻敵諸事

持大體不事喫咻上至士大夫下逮耕夫織婦咸感戴流涕曰賈公活我生平著述成於河南者爲多集告誡吏民條教爲退厓公牘八卷記前賢往事以資考鏡爲退厓日劄一卷郡齋筆乘一卷洛言一卷平生喜吟詠足跡所至心感目觸皆寓之於詩有洛中吟後洛中吟二卷如京集續如京集各一卷外集蘊聲詩畧一卷初道光二十九年越南貢使過豫臻守河南供張館塗月餘贈答編爲貢使日記一卷又稱述先德搜輯遺文爲賈氏手澤彙編四卷統名之曰躬自厚齋叢書

趙延珍

馬輝

趙延珍字席齋定州人事繼母石盡孝弟延瓚死撫七月遺孤愛如己出爲文奧衍受知於學使熊伯龍康熙三十六年以舉人授山東博平知縣革除雜派民愛之如慈母巡撫王國昌以催科不

擾實心實政旌之三十八年 聖祖南巡舟次博平慰問有加博
瀕河歲簽民挑濬獨南旺去博三百餘里臘初起工先期押夫八
十名赴工所往往凍斃延珍上僱夫均攤之策監司然之四十一
年淫雨爲災姦民乘筏肆掠吏民皆束手延珍簡壯勇禽治其渠
而撫其從者郡守下其法於他邑民賴以安又明年振事畢致政
歸卒後五十年有馬輝者字德章乾隆十八年拔貢官河南陝州
州判治鄭睢振事有勞移判廣德會審邪教白僧人通源之枉再
調山西絳州厯署吉州知州稷山河津知縣政績卓然後升浙江
桐廬知縣引疾歸生平好義尤究心理學諸書中丞譚尙忠稱之
爲威鳳一羽年九十卒著有簡通錄行世譚尙忠之子光祥視學
雲南重刊之以訓士子并奏呈御覽故流傳益廣云

尹烈字允揚南皮人康熙三十六年進士授河南輝縣知縣勸農桑修學校廉潔自持人無敢干以私閱舊案有田某者疑其寃已定讞半載矣覆訊得其實力辯於上官遂得釋巨猾某積惡多不法訪獲除之一縣稱快時有白面包公之頌常以事過新鄉旣暮里民蟻集執燈火迎送之僉曰輝民父母新民願借久矣撫軍徐潮深器之謂曰君非百里才暫躋驥足耳潮尋擢工部去新撫趙宏燮以不附其奴裁欸論罷迫令兩司會參皆執不可且爲辯曰輝令當參豫官無一可留者爭之不能得怡然解組而歸越十載宏燮以姦發獲罪上命凡其前所奏參者悉復其官烈以年高不復出

汪與恆

子欽

汪與恆字久也灤州人少貧館於鄉時有吏虧官帑欲鬻其子與

恆悉以館穀代償之遠近稱焉康熙二十三年舉鄉試第一三十九
年成進士選授福建長泰知縣歲大旱 朝命截漕粟三十萬振
饑與恆盡心區畫全活甚眾鄰境有盜魁陳五顯者嘯聚飢民窟
箐林巖谷閒時出抄掠與恆練鄉兵禦之敗賊於白泉社民獲安
堵由是廉能聲大著監生楊錫珪者強健而狡與恆遇事裁抑積
忿不得逞五十年辛卯與恆分校入闈巡撫黃秉忠欲其客登第
通關節於與恆閱其文不佳大批俗嫩不成章五字黜之秉忠怒
遂中以墨令藩司金培生窮治之錫珪伺隙控與恆前所薦士王
某有交通關節狀蓋王實以傳遞獲雋與恆不知也訊時堅不承
金怒目睨與恆曰明日復按與恆見事急買酖自隨曰吾豈受奸
黨辱耶詰旦金以生日筵客忽中惡死與恆得長繫後 朝命部
臣張鵬翮趙申喬滿寶等至閩訊勘盡得狀奏上奪秉忠職培生